

臨榆縣誌（光緒） 二

臨榆縣志卷之六

輿地編一 星野 疆界 形勝 山水上

星野

箕尾燕之分野此定論矣至詳測度數嘗考帝王
世紀周天百七萬九千餘里徑三十五萬六千九
百七十餘里分爲十二次次三十餘度度得里二
千九百三十有二惟天穹而地弦天大而地小不
可以天之星準地然約略推之一州一邑不足當
其一度也裨竈有言天道遠人道邇故臆說不敢

參謹詳加引徵切於本地者錄之以資攷訂

周禮注析木燕也

周禮總義析木燕之分星幽州之星土也

春秋昭公八年左傳注箕斗之間有天漢故謂之析木之津

春秋元命苞箕星散爲幽州分爲燕國

春秋說題辭箕尾爲燕

爾雅注箕龍尾爾雅疏尾箕在蒼龍之末故曰龍尾史記天官書尾箕幽州又曰東宮尾爲九子

漢書地理志燕地箕尾分野東爲漁陽右北平遼西
遼東西有上谷代郡雁門南得涿郡之易容城范
陽北新城故安涿縣良鄉新昌及渤海之安次皆
燕分也樂浪元菟亦宜屬焉自危危當作尾疑誤四度至
斗六度謂之析木之次燕之分也

晉書天文志自尾十度至南斗十一度爲析木於辰
在寅燕之分野屬幽州又右北平入尾七度西河
上郡北地遼西東入尾十度

隋書地理志自尾十度至南斗十一度爲析木屬幽

州

唐書天文志析木爲雲漢末派山海極焉故其分野
自北河末派窮北極之曲東北負海爲析木負海
者以其雲漢之陰也又尾箕析木津也初尾七度
終南斗八度自渤海九河之北得漢河間涿郡廣
陽反上谷漁陽右北平遼西遼東樂浪元菟古北
燕孤竹無終之國尾得雲漢之末派龜魚麗焉當
九河之下流濱於渤海皆北紀之所窮也箕與南
斗相近爲遼水之陽盡朝鮮三韓之地在吳越東

南又天寶九載八月五星聚於箕尾熒惑先至而
又先去尾箕燕分也

唐書地理志瀛莫幽易涿平嬀擅薊營安東爲析木
津分

宋史天文志尾宿九星按漢永元銅儀尾宿十八度
唐開元游儀同舊去極百二十度一云百四十度
今百二十四度景祐測驗亦十八度距西行從西
第二星去極百二十八度在赤道外二十二度乾
象新書二十七度箕宿四星按漢永元銅儀箕宿

十度唐開元游儀十一度舊去極百十八度今百
二十度景祐測驗箕四星十度距西北第一星去
極百二十三度

元史麻志周天列宿度用管窺今制渾儀測用二線
所測度數分秒與前代不同尾十九度一十分箕
十度四十分

帝王世紀白尾十度至斗七度百三十五分而終曰
析木之次辰在寅謂之攝提格於律爲應鍾斗建
在亥今燕分野

明統志永平府延慶州保安州萬全都指揮使司天文尾分野

一統志永平府禹貢冀州之域尾分野

文獻通考尾九星去極一百二十七度半箕四星去極一百二十一度

山堂考索尾箕星曰析木宮曰人馬時曰寅州曰幽協紀辨方房心尾箕四宿界卯寅二宮共占三十八度

古今律曆考尾漢太初厯洛下閎所測十八度宋皇

祐所測十九度崇寧所測十九度少元授時厯郭
守敬所測十九度十分箕太初厯十一度皇祐所
測十度元豐所測十一度崇寧所測十度半授時
厯所測十度四十分

鄭漁仲通志尾十九度箕十一度

樂軒集星度分野十二次東西南北相及者四疑似
者七所可據者其惟析木乎其宿尾亦艮之維燕
可以言東北也

太平寰宇記幽州星分尾箕涿州星分尾宿十六度

薊州星分尾三度霸州星分箕尾燕州星分尾斗
清類天文分野之書宛平大興良鄉尾一度通州三
河武清尾二度昌平順義密雲懷柔尾三度涿州
房山霸州文安尾四度豐潤玉田薊州保定尾五
度遵化平谷尾七度

此係日下舊聞所載故不及永平

步天歌尾九星如鈎蒼龍尾下頭五點號龜星尾上
天江四橫是尾東一箇名傳說傳說東邊一魚子
尾西一室是神宮所以列在后妃中箕四星形狀
似簸箕箕下三星名木杵箕前一星是糠皮

按晉書天文志云右北平入尾七度西上郡北地
遼西東入尾十度據陳卓范蠡鬼谷先生張良譙
周京房張衡並云尾箕幽州涼州入箕中十度上
谷入尾一度漁陽入尾三度涿郡入尾十六度渤
海入箕一度樂浪入箕三度元菟入箕六度廣陽
入箕九度合參之山海分野可以見矣

以上星野

疆界

夫仁政必自經界始是雖百里之雷封亦不可忽

也邑自改縣後迄今百四十餘年版圖式廓幅員
既長而欲撫治者懷茲

賜履釐厥井疆則自西自東自南自北其里數之近遠
與夫邊幅之毗連可勿詳志以爲規畫之一助歟
臨榆縣東西廣七十里南北袤二百三十里

東至關外紅牆甯遠州界十里

西至深河撫甯縣界六十里

南至海十里

北至義院口邊七十里自義院口至羊山嶺承德

府界一百五十里

東南至海十里

西南至戴家河撫甯縣界七十里

東北至條子邊承德府界七十里

西北至碼礮嶺撫甯縣界七十里

西至京師順天府治六百八十里

至直隸省垣千有十里

至永平府治百七十里

東至奉天府治八百里

以上疆界

形勝

山海交會隘塞嚴闕形勝稱最要焉故歷代據爲
邊鎮宿兵雲屯霧集刁斗聲相聞居民懍懍慄慄
如瀕淵崖地亦巖疆哉逮茲

盛世鎖鑰

兩京冠蓋交衝車書旁午抱關而稽出入與縣治聲教
相繼時以界嚴孔道用爲太平之令甲也

渝關東北循海有道道狹處纔數尺旁皆亂山高峻

不可越北至進牛口舊置八防禦軍募士兵守之

通鑑

燕之渝關吳之西陵蜀之漢樂地有所必據城有所

必守 地理通釋

明洪武初卽古會州大寧地設北平行都司興營諸

屯衛封建寧藩與遼東宣府東西聯絡爲外邊徐

魏國公經略自古北口至山海關增修關隘爲內

邊 會典

宏治中薊遼巡撫洪鐘築邊牆自山海抵居庸二百

七十餘處隆慶中軍門譚綸請築敵臺三千自居庸東至山海

山海關在撫甯縣東其北爲山其南爲海實險要之區一統志

長城之枕護燕薊爲

京師屏翰擁雄關爲遼左咽喉畿輔通志

峭壁洪濤聳滙南北東若囊牖永平府志

以上形勝

山水上

輿地編 山水